

PAS tuduh Umno terlibat insiden koyak Harakah
MalaysiaKini.com
April 07, 2012

PAS hari ini mendakwa parti lawan mereka Umno terlibat dalam kejadian mengoyak akhbar rasmi parti Islam itu Harakah di Putrajaya kelmarin akibat takutkan rakyat bermaklumat tentang perkara sebenar.

"Mereka sedar kalau rakyat membaca Harakah atau media alternatif, rakyat akan mendapat maklumat sebenar tentang sesuatu isu yang berlaku. Inilah yang ditakuti mereka," kata ketua Penerangan PAS Datuk Tuan Ibrahim Tuan Man.

harakah frontpage 240403Bernama kelmarin melaporkan, lebih 100 penduduk Presint 8 berkumpul di medan selera di kawasan mereka dan mengoyakkan Harakah, yang didakwa diletakkan di rumah atau peti surat apartmen penjawat awam di Putrajaya.

Wakil penduduk Roslan Abu Hanif dilaporkan berkata, tindakan itu dibuat sebagai tanda bantahan kerana mendakwa "banyak berita tidak benar" dimuatkan dalamnya.

Dalam kenyataannya hari ini, Tuan Ibrahim berkata, tindakan itu ekoran ramai penduduk menerimanya dengan hati terbuka dan mula berminat dengan Harakah.

"Belum pernah kita dengan ada pihak yang membakar atau mengoyak akhbar kerana ia diberi secara percuma.

"Ini agaknya yang dikatakan buang tabiat, sebagai petanda awal sesuatu itu nak mati," kata Tuan Ibrahim.

